

Headlines

- 1 लोकसभा दे कल होने आले चौथे गेड़ दे चुनांs लेई सब्बै तैयारियां मुकम्मल, श्रीनगर पार्लियामानी हलके लेई 17 लख 47 जहार 10 योग्य मतदाता कल 24 मेदवारें दे सियासी भविक्ख दा फैसला करडन।
- 2 जम्मू-कश्मीर दे मुख् चुनांs अधिकारी होरें आखेआ ऐ जे भारतीय चुनांs आयोग नै श्रीनगर हलके च सियासी कार्यकर्ताएं गी कथित तौर पर डराने-धमकाने दिएं रिपोर्टें दा संज्ञान लैत्ता ऐ।
- 3 रियासी जिले दे जांगली इलाके च सुरक्षाबलें, आतंकवादिएं दे इक गुप्त ठकाने दा पता लाइयै ओहदा नास करी दित्ता ऐ। बांडीपोरा च सुरक्षाबलें आतंकवादिएं दे इक मददगार गी गिरफ्तार कीता ऐ।
- 4 उत्तर रेलवे दे जनरल मैनेजर होरें उधमपुर-श्रीनगर-बारामूला रेल लिंक परियोजना दा निरीक्षण कीता। उनें रियासी ते संगलदान बश्कार कम्में गी इस बारे जून म्हीने तगर सबूरा करने दे निर्देश दित्ते न।

<><><><><><>

LS- 4<sup>th</sup> Phase

कल होने आहले लोकसभा दे चौथे गेड़ दे चुनां लेई सब्बै तैयारियां करी लैत्ती गेदियां न। इस गेड़ तैहत कल श्रीनगर पार्लियामानी हलके च बी वोट पाए जाने न। श्रीनगर हलके च कुल 17 लख 47 जहार 810 मतदाता न जिंदे चा 8 लख 75 जहार 938 मर्द, 8 लख 71 जहार 808 महिलां, 64 ट्रांसजेंडर, तकरीबन 11 जहार 668 दिव्यांग मतदाता ते 705 मतदाता नेय बी हैन जिंदी बरेस 100 बरें शा मती ऐ। एह मतदाता कल अपने वोट पाने आले हक्के दा इस्तेमाल करदे होई 24 मेदवारें दी किस्मत दा फैसला करगन। इस सेट लेई मुख् मुकाबला कांग्रेस ते इंडी गठबंधन दे समर्थन आले नेशनल कांफ्रेंस दे मेदवार अगा सैय्यद रहल्ला मेहदी, पीडीपी दे वहीद-उर-रहमान परा, अपनी पार्टी दे मोहम्मद अशरफ मीर ते डेमोक्रेटिक प्रोग्रेसिव आजाद पार्टी दे अमीर अहमद भट्ट हुंदे बश्कार ऐ। मतदान बडुलै 7 बजे शुरू होइयै संज्ञा 6 बजे तगर चलोग। वोटें दी गिनतरी मुख् भरै च 4 जून गी होग।

<><><><><><>

CEO-JK

जम्मू-कश्मीर दे मुख् चुनां अधिकारी पांडुरंग.के. पोले होरें आखेआ ऐ जे भारती चुनां आयोग नै श्रीनगर पार्लियामानी हलके च होने आले लोकसभा चुनां शा पैहले सियासी कार्यकर्ताएं गी कथित तौर पर डराने-धमकाने दिएं रिपोर्टें दा कडा संज्ञान लैत्ता ऐ। सोशल मीडिया मंच एक्स पर जारी इक्क पोस्ट च श्री पोले होरें आखेआ ऐ जे किश सियासी पार्टिं दे कार्यकर्ताएं गी कथित तौर पर डराने-धमकाने ते दफा-144 हुकम दे इस्तेमाल दियां शकैतां सामने आइयां न। उनें गलाया जे भारती चुनां आयोग नै इस मामले दा संज्ञान लैत्ता ऐ। बयान च आखेआ गेआ ऐ जे मुख् चुनां अधिकारी होरें सियासी लीडरें कन्नै इस बारै आपूं गल्लबात बी कीती ऐ। उनें साफ कीता जे नियमें मुजब चुनावी हलके च प्रचार खत्म होने दे बाद मतदान शा पैहले आले 48 घैंटें दुरान दफा-144 लागू कीती जंदी ऐ ते इयै आदेश उधमपुर ते फही जम्मू संसदी हलके च बी मतदान शा पैहले लागू कीते गे हे ते हुन पुलवामा सने श्रीनगर हलके दे सब्बनें जिलें लेई बी इयै हुकम जारी कीते गेदे न। एहदे शा पैहले नेशनल कांफ्रेंस, पीडीपी ते अपनी पार्टी नै दोष लाया ऐ जे प्रशासन नै श्रीनगर हलके च चुनां शा पैहले उंदे कार्यकर्ताएं ते एजेटें गी गिरफ्तार करना शुरू करी दित्ता ऐ। उनें प्रधानमंत्री, गृहमंत्री, भारती चुनां आयोग ते लेफ्टिनेंट गवर्नर होरें गी इस मामले च दखल देने दी मंग कीती ही।

<><><><><><>

Paid-Holiday

जम्मू-कश्मीर दे लेबर कमीशनर चरणदीप सिंह होरें जनप्रतिनिधित्व अधिनियम 1951 दी दफा 135-बी गी लागू करने दे कल निर्देश जारी कीते। एहदे तैहत कुसै बी कम्म-रोजगार, कारोबार, उद्योगिक उपक्रम चा कुसै होर थाहर कम्म करने आहले अमले गी वोट पाए जाने आहले ध्याड़े सनें तनखा छुट्टी देने दा प्रावधान ऐ। श्रम आयुक्त होरें भारती चुनां आयोग ते मुख् चुनां

अधिकारी दे निर्देशों पर लौ पांटे होई मैहकमें दे अफसरें अगगे अपील कीती जे ओहू अपने दायरे इख्तियार च औने आहले सब्बनें मैहकमें ते निजी मालकें गी सने तनखा छुट्टी सरबन्धी निर्देश दी पालमा करने लेई कार्रवाई करना। एहू निर्देश दित्ता गेआ ऐ जे श्रीनगर, बारामूला ते अनंतनाग-राजौरी, बारामूला ते अनंतनाग-राजौरी संसदीय हल्के च बारी-बार 13, 20 ते 25 मई गी सनें तनखा छुट्टी मनाई जा।

<><><><><><>

### RO-Udhampur

उधमपुर संसदीय हल्के लेई रिटर्निंग अफसर डॉक्टर राकेश मिन्हास होरें बक्ख-बक्ख सियासी पार्टिणं दे प्रतिनिधिणं ते प्रशासनिक अधिकारिणं कन्नै कल इक बैठक लाइयै औंदी 4 जून गी होने आली वोटें दी गिनतरी सरबन्धी प्रबंधें बारै चर्चा कीती। बैठक दरान डॉक्टर मिन्हास होरें सब्बनें सियासी पार्टिणं आस्सेआ वोटें दी गिनतरी मतल्लक अपने एजेंटें दे ब्यौरे बेल्ले सिर जमा करोआने दे महत्व पर जोर पाया। उनें आखेआ जे एजेंटें गी फौरी तौर पर शिनाख्ती कार्रवाई जारी करने ते वोटें दी गिनतरी दे कम्मै च उंदी निर्विघ्न शमूलियत लेई इयां करना अत्त-लाजमी ऐ। इस मौके एहू दस्सेया गेआ जे जागतें दे सरकारी डिग्री कालेज कठुआ दे 18 हाल वोटें दी गिनतरी लेई रक्खे गे न। डॉक्टर मिन्हास होरें चुनां लड़ा करदे मेदवारें दे सब्बनें प्रतिनिधिणं गी अपील कीती ऐ जे ओहू 25 मई तगर अपने एजेंटें दे ब्यौरे जमा करोआई देन।

<><><><><><>

### J&K-Ammunition

केंद्र शासित प्रदेश जम्मू-कश्मीर दे जिले रियासी च सुरक्षा बलें जिले दे इक्क जंगली इलाके च आतंकियें दे छप्पने आहले ठकाने दा पता लाइये उत्थुआं हथियारें दा जखीरा बरामद कीता ऐ। सूत्रें मुजब माहौर इलाके दे कोट बुदन दे जंगली इलाके च अज्ज बडुलै राश्ट्री राइफल्स ते पुलिस दी सांझी कार्रवाई दौरान इस आतंकी ठकाने दा पता लाइयै इसी तबाह करी दित्ता गेआ। सूत्रें जानकारी दित्ती ऐ जे खीरी समाचार थहोने तगर अभियान अजें जारी हा। तोआई जम्मू-कश्मीर दे बांदीपोरा च सुरक्षाबलें दे इक सांझे तपाशी अभियान च आतंकवादियें दे इक्क मददगार गी हथियार ते गोला-बारूद सने हिरासतै च लैता गेआ। पुलिस नै दस्सेया जे इक्क सांझे तपाशी अभियान च जम्मू-कश्मीर पुलिस, सेना, सी.आर..पी.एफ नै बांदीपोरा च इक्क सांझे अभियान दौरान आतंकियें दे सहयोगी गी गिरफ्तार कीता गेआ। औदे कब्जे शा पस्तोलां, पस्तोल दियां मैगजीनां ते किश रौंदें सनमें हथियार ते गोला-बारूद बी बरामद कीता गेआ।

<><><><><><>

### Northern-Railway

उत्तर रेलवे दे महाप्रबंधक शोभन चौधरी होरें टकोहदी उधमपुर-श्रीनगर-बारामूला रेल लिंक परियोजना दा अज्ज बी निरीक्षण जारी रक्खेआ। श्री चौधरी होरें चनाब पुल दथमां संगलदान स्टेशन तगर मोटर ट्राली राणं बरीकी कन्नै जांच पड़ताल कीती। उनें बक्कल, दुग्गा, सावलाकोट संगलदान हिस्सें च ट्रैक दे सब्बनें कम्ममें, सिग्नल ते दूर संचार कम्मै दा निरीक्षण कीता। महाप्रबंधक होरें कम्मै दी रफ्तार ते मय्यार पर संदोख प्रगट कीता ते ते अफसरें गी आखेआ ऐ जे ओहू कम्ममें कारवाइयें पर नेडमीं तक्क रक्खन। उनें निर्देश जारी करदे होई आखेआ जे ओहू कम्म तोड़ चाढने आहले तय समें गी अगगे नैई बदान ते जेहडी बी कमी ऐ, उसी तनदेयी कन्नै कम्म करदे होई दूर कीता जा। श्री शोभन होरें परियोजना कन्नै जुडे दे अफसरें गी संगलदान थमां रियासी तगर दा कम्म, जेडा 46 किलोमीटर दा ऐ, उसी 24 जून तगर तोड़ चढने लेई जोर भरेया।

<><><><><><>

### Gen. Manoj Pande

सेनाध्यक्ष जनरल मनोज पांडे होरें सेना दिणं मन्त्री-परमन्त्री दिणं हस्तियें ते मकामी अफसरें कन्नै उधमपुर च हाल च गै परतियै नमें सिरेया तैयार कीते गेदे कमान अस्पताल दा अज्ज दौरा लाया। उत्तरी कमान नै एक्स पर कीती गेदी इक्क पोस्ट च गलाया जे 650 बिस्तरें दी सहूलत आहले इस अस्पताल च अज्जै-कल्लै दा बुनियादी ढांचा, बेहतरीन सेहत, दिक्ख-रिक्ख ते सामुदायिक विकास दे प्रतीक दे तौरा पर खड़ा ऐ। अपने दौरे दौरान सेना अध्यक्ष होरें अस्पताल च इलाज करोआ करदे मरीजें ते नीम डॉक्टरी अमले कन्नै गल्ल-कत्थ बी कीती। उनें सब्बनें रैंकें दी उंदी पेशेवराना रवैये करियै सराहना कीती ते उनेंगी बेहतर नतीजें लेई अपरिं कोश्टां जारी रखने लेई प्रोत्साहित कीता।

<><><><><><>

## CRPF

केंद्री रिजर्व पुलिस बल दी 84 बटालियन नै सरकारी हायर सेकेंडरी स्कूल कुद् उधमपुर च इक्क दिनें आहले मुफ्त मेडिकल कैंप दा सरिस्ता कीता। कैंप दा उद्घाटन बटालियन दे कमांडेंट एन. रणबीर सिंह होरें कीता। इस मौके बोलदे होई उनें गलाया जे विशाल ते बन-सबन्नता आहले देस भारत दी अंदरूनी सुरक्षा दी जिम्मेदारी सी.आर.पी.एफ गी सौंपी गई ऐ, इस्सै लेई इसी मुख्य भरै च तैनात कीते गेदा ऐ। मेडिकल कैंप च बुजुर्गे महिलाएं ते बच्चे सने तकरीबन 250 लोडमंद ग्रामीणें हिस्सा लैता। उंदी जांच करियै दोआइयां बी दित्तियां गेइयां।

<><><><><><>

## IMD

भारती मौसम विभाग नै अगले दऊं दिनें दौरान जम्मू-कश्मीर, लद्दाख, गिलगित बाल्तिस्तान, मुजफ्फराबाद, हिमाचल प्रदेश ते उत्तराखंड च तूफान ते गर्जो-गर्जी कन्नै बरखा बरने दी पेशनगोई कीती ऐ। तोआई अज्ज दिल्ली च अंधी-झक्खड कन्नै बरखा बरी सकदी ऐ। राजधानी च घट्टोघट्ट ते बद्दोबद्द तापमान 25 शा 38 डिग्री सैल्यिस बरकरार रौहने दी संभावना ऐ।

<><><><><><>

## Vinayak-Thapa

हाल च गै संयुक्त भारती खेड्डु फेडरेशन खेड्डु च सुन्ने दा तगमा जित्तने आहले ताइक्कांडो खडारी विनायक थापा हुंदा अज्ज सांबा जिले च अपने जद्दी ग्रं बडी कामिला पुज्जने पर गर्मजोशी कन्नै सौआगत कीता गेआ। ध्यानजो ऐ जे खेड्डुं 3 शा 8 मई तगर श्रीलंका दे कोलंबियो च आयोजित कीती गेदियां हियां। इनें खेड्डुं च पाकिस्तान, बांग्लादेश, दक्खन कोरियाते चीन सनें भारत दे खडारियें हिस्सा लैता हा। फाइनल च विनायक हुंदा मकाबला चीन दे खडारी कन्नै होआ हा। विनायक होरें अजे कवारे न ते उनेंगी भारत सरकार दे कार्पोरेट मंत्रालय आस्सेआ इनें खेड्डुं ताई 17एं बरें कोला हेठली बरेसू दे वर्ग च चुनेया गेआ हा।

<><><><><><>

## Olympic

2024 आहिलयां पेरिस ओलंपिक खेड्डुं ताई कोटा हासल करने आहले अमन सहरावत होर पैहले भारतीय मर्द पहलवान बनी गेन। एशियाई चैंपियन सहरावत होरें कल इस्ताबुल तुर्किये च विश्व कुश्ती ओलंपिक क्वालीफायर च मर्दे दे 57 किलोग्राम फ्रीस्टाइल वर्ग च पेरिस कोटा हासिल कीता। सहरावत होरें सेमिफाइनल च कोरिया दे चोंग सोंग हान गी 12-2 कन्नै हराया ऐ।

<><><><><><>